

մահ է: Որքան եւ իզուր թափոած լիներ մշակի քրտինքը, որքան եւ յուսահատական լիներ նրա դրութիւնը, դարձեալ նա կենդանի մարդ է, նա գործում է, նա պատերազմում է իր գոյութիւնը ոչնչացնող դժարութիւնների հետ. նրա մէջ մեռած չէ ինքնապահպանութեան զօրութիւնը: Եւ այս՝ կեանքի եւ մահու կռոյի մէջ՝ նա իրան պատրաստում է մի օրոյ համար, երբ կը տիրեն իրաւունքը եւ արդարութիւնը, երբ կ'ազատի աղաների հարստահարութիւնից: Այն ժամանակ կը գայ մշակ մարդու արքայութիւնը, այն մարդու, որ գործ ունի արդար եւ հաւատարիմ բնութեան հետ, որ չէ մտածում իր նման մարդերի քրտինքից իր համար ապրուստ քամել...

Այո՛, այս ճշմարտութիւնն անհասկանալի էր ինձ այն ժամանակ, ե՛ս, ե՛ս միայն էի անգործ արարածը այն ընդարձակ տարածութեան մէջ, ուր ամէն մարդ զբաղուած էր իր աշխատանքով: Ո՞վ գցեց ինձ այն մոլորութեան մէջ, ո՞վ սպանեց իմ մէջ աշխատասիրութեան եռանդը: Ես մտաբերեցի հայր թողիկի վարդապետութիւնը, որ նա մեկնում էր իր աշակերտներին իր բուն բառացի իմաստով. «մարդը պետք է երկնքի թռչունների նման ապրէ, որոնք ոչ վարում են, ոչ ցանում են եւ ոչ հնձում են, բայց միշտ կուշտ են, աստուած հասցնում է նրանց կերակուրը»: Այդ խօսքերը նա իր գլխից չէր դուրս տալիս, դրանք գրքից առած խօսքեր էին: Հիմնուելով յիշեալ բնաբանի վրայ, տեր-հայրը ընդարձակում էր այն միտքը, «թէ պետք չէ հոգ տանել այս աշխարհի կեանքի համար, նա ունայն եւ անցաւոր է, թէ իւրաքանչիւր մարդու համար աստուած նշանակել է նրա օրական պարէնը (ապրուստը), մեկին շատ, մեկին քիչ. նոյնը կհասցնէ նա անընդհատ կերպով եւ չի թողնի իր արարածը քաղցած մնայ: Մարդից, իրանից, ոչինչ կախած չէ, որքան եւ ջանք գործ դնէր, դարձեալ նա չէ կարող մի մազաչափ անելացնել, կամ պակասացնել ապրուստի այն չափից, որ նշանակել է նրա համար աստուած»:

Քահանայի վարդապետութիւնը եւ Հասօի խօսքը ծնուցին իմ մէջ երկու միմեանց հակառակ գաղափարներ. մեկը անհոգութիւն եւ յոյս դնել աստուծոյ նախախնամութեան վրայ. միւսը՝ գործունեութիւն եւ յոյս դնել իր աշխատող ձեռքերի վրայ: Որ՞ն էր դրանցից ճշմարիտը. ես որոշել կարող չէի, միայն մտածում էի՝ թէ քահանայի ասածը պետք է որ ուղիղ լինի, որովհետեւ տեսնում էի՝ մարդիկ այնքան աշխատում էին, կաշուց դուրս էին գալիս, դարձեալ մտում էին աղքատ: Երեւի, ասում էի ես, նրանց ապրուստը այնպէս քիչ է նշանակած, որ նրանք երբեք չեն կարող լինել ապահոված: Իսկ աղան կը մնայ միշտ աղա, որովհետեւ նա ոչ վարում է, ոչ ցանում է, ոչ հնձում է, եւ նրա սեղանը միշտ լի է եւ ճոխ...